

**2013-imi aningaasanut inatsimmi 3 mio. kr.-inik filmiliornermut tapiissutinik aningaasaleeqqinnikkut 2012-imisulli aningaasanut inatsisaanni annertussusilinnik aningaasaliinissamik siunnersuuteqarnissamik Naalakkersuisut peqquneqarnissaannik Inatsisartuni aalajangiiffigisassatut siunnersuut.**

(Inatsisartuni ilaasortaq Doris Jakobsen, Siumut )

### **Akissuteqaat**

(Ilaqutariinnermut, Kultureqarnermut, Ilageeqarnermut Naligiissitaanermullu Naalakkersuisoq)

### **Siullermeerneqarnera**

2013-imi aningaasanut inatsimmi 3 mio. kr.-inik filmiliornermut tapiissutinik aningaasaleeqqinnikkut 2012-imisulli aningaasanut inatsimmi annertussusilinnik aningaasaliinissamik siunnersuuteqarnissamik Naalakkersuisut peqquneqarnissaannik Inatsisartuni aalajangiiffigisassatut siunnersuummik Inatsisartuni ilaasortaq Doris Jakobsen saqqummiussaqqarpoq.

Siunnersuuteqartup siunnersuuteqarnermini ilaatigut tunngavilersuutigaa 3 millioner kr.-nit siunnersuutigineqartut piginnaanillit ineriartornissaannut tapiissutitut tunniunneqarsinnaassasut, taamaaliornikkut suliniutaat isumassarsialatsiamiit piviusunngortinneqarsinnaassammata nunani allani ingerlatseqataasunut tunineqarsinnaanngorlugit.

Naalakkersuisut isumaqatigaat kalaallit filmiliaannut tapiissuteqartarnissaq pingaartuummat. Filmit pingaaruteqartuupput oqaatsit atorlugit oqaatigineqarsinnaanngitsut nipilersuutitulli paaseqatigiinnermut aqquataasinnaammata. Takusassiatut eqqumiitsuliornerit misigisatsinnut sunniillutillu sakkortusisitsisarput, taamaalillutillu filmit aamma kulturitsinni pingaaruteqarlutik inissisimapput.

Filminut tapiissuteqartarnermut aqqissuussinermi atuuttumi oqaluttualiat, piviusunik tunngaveqartunik filmiliat filmillu kulturitsinni eqqumiitsuliornermik paasissutissiillutik eqqumiitsuliornermik pingaartitsisut qitiutinneqarput. Filminut tapiissutitut aningaasaliissutit ukiumi arlaqartuni suliniutinut ajunngitsunut pissanganartunullu piviusunngortitseqataasarsimapput, tamakkulu inuiattut isiginitinnut nunarsuarmilu inuit uatsinnut paasinninnissaannut annertuumik pingaaruteqarsimapput. Inuusuttut arlallit ukiumi kingullerni filmiliornissamik aallartitsisarsimapput, Naalakkersuisullu nuannaarutigaat tassuuna malunnartumik ineriartortoqarmat.

Naalakkersuisut tapiissuteqartarnermut aqqissuussineq massakkut atorneqartoq ilaatigooriarluni suliniutinut mikinerusunut tapiissuteqarnissamut taamaallaat periarfissiisnaammata ilisimalluarpaat, tamannali aningaasaateqarfiit aningaasaliisullu allat eqqarsaatigalugit annertuumik pingaaruteqarsinnaammata aamma ilisimavaat.

Naalakkersuisut isumaqarput piginnaasaqartut ineriartornissaannut periarfissanik ingerlatitseqqinnissaq filmiliornerullu ineriartortinnissaanut qulakkeerinneqataanissaq soqutiginaruusut.

Siusinnerusukkut danskit kultureqarnermut ministererisimasaat tamanna pillugu oqaloqatigineqarnikuvoq, septemberimilu danskit kultureqarnermut ministeriata tikeraarnissaanut atatillugu filmiliornermut tapiissuteqartarneq pillugu oqaloqatiginiarpara, tapiissuteqarnissamullu periarfissat sorliit kalaallit filmiliorneranni aqqissuussinermi atorneqarsinnaanersut paasiniarlugit.

Naalakkersuisut taamak oqaaseqaateqarlutik siunnersuutip ilalerneqannginnissaanik inassuteqarput.